

ACHTUNG, S'ISCH HÄÄL! – HÄÄ?*

da Silvana Derungs

Baterlar e viandar – quai tuna plitost suenter il motto dal club da seniors che dad in truppa da giuvens e giuvnas sin viadi atras la Svizra. Ma divertent èsi tuttina.

«Essas vus ina gruppa religiosa?»

Ils 23 da fanadur è sta il di da project da Get-Together a Cuira per la gruppa Müstair. L'aura plitost bletscha ha dentant impedì in pau la glied da sa fermar en la via da la posta a Cuira e prender temp per l'intent dal project. Dad ina tura tras la citad principala dal Grischun e dad ina visita en la Chasa RTR e dad in curs da rumantsch grischun exclusiv da la GiuRu han perquai mo profità ils quatter guids da questa gruppa e Ramona Schneider, la manadra dal project. Insumma, sin il viadi da Müstair fin a Cuira hajan els gi plitost pauca participaziun. En general tegnia la glied quai bain per in interessant project, ma chaminar veglian tuttina mo paucs. Uschia Ramona che mida sco coordinatura in pau tranter la gruppa Müstair e la gruppa Chancy vi e nà.

Els sajan era gia vegnids confruntads cun la dumonda, sch'els fetschian part dad ina secta e giajan per motivs religius sin viadi, ma di Jonas, in dals guids. Jonas studegia a Berna ed è gist returnà dad in semester a Helsinki. Quest viadi da tschintg emnas atras la Svizra veglia el nizzegiar per emprender d'enconuscher in pau meglier la Svizra ed era per puspè sa disar in pau a la vita normala suenter ses excurs finlandais. Ils motivs da sa mover ed attraversar differentas parts da la Svizra e sias culturas èn er avant maun tar ils auters guids: Alexander, Aude ed Ola. Ma era tar ils participants "normals", sco quai che era jau sun stada ina la sonda, sin il viadi da Cuira a Glion.

Guardai il bel capricorn!

La sonda dals 24 da fanadur èn bain 10 persunas prontas a las 8.00 uras a la staziun da Cuira. Glied da Turitg, Basilea, Sursilvania, Berna, Lucerna, Son Gagl e mia paucadad dal Grischun. Ina leva plievgia ans accompagna fin a Favugn, nua ch'ils participants dal curs dad rg pon trair a niz ina frasa dal curs dal di avant – era sch'il capricorn è mo ina figura sin il tetg dad ina chasa. A Tumein s'unescha Julia Slater da Londra/Berna, schurnalista

per swissinfo.ch e frequentadra dal curs da rumantsch a Laax, cun nosssa gruppa, fertant che dus schurnalists da Tink.ch ans bandunan puspè.

Il viadi cuntinuescha – senza sulegl, ma era senza grondas chaliras – sur Trin-Digg atras la Ruinaulta e lu viers Glion. A Valendau prevediss la ruta da las Sendas culturalas da la Svizra dad ir sur Sagogn-Laax-Falera-Glion, ma quai fiss anc in brav sforz per quel di, uschia che nus prendain la via a la grada dal Rain siadora vers Glion, nua che nus arrivain curt avant las 19.00 uras.

Il viadi n'è atgnamain betg stà stentus, ma lung avunda e cun baterlar – in pau tudestg, in pau talian, in pau franzos, in pau anglais, in zicalin rumantsch – na chaminan ins era betg vaira svelts... Fertant ch'ils blers sa rendan en la claustra da Glion per tschenar e durmir, ma platg jau puspè en la Viefier retica vers Cuira, ma dumandond, tgi da quels che vomia anc a l'Openair Lumnezia, sco quai ch'i era atgnamain planisà per quella saira.

* In pled nov ch'jau hai prendì cun mai da quella spassegiada: durant che nus gievan sur ina punt da lain bletscha ha ina giuvna da la Sursilvania duvrà quest «hääl» che munta tant sco «glisch, glischnus». Ma nagin l'ha chapì.

